





*Poex: 1246*




2530



1869 11. 387

























5

*Frid. Zamell*

# DIOXIPPUS EXMANGONE

Sive

## Gothuniæ celebratio.

ELBINGÆ Typis Bodenhausianis  
Anno M. DC. XXXV.



# Ad Illustris: Regni Svet.

Proceres.

**O**tia diligimus, sed non ignava, Poeta:  
    Queis liquet exactos non periisse dies.  
Hactenus, ô Proceres, genitalia diximus arva:  
    Gentis ad Arctoæ nunc ego vertor opes.  
Integra si vestro præstabitis otia Vati;  
    Crescet ab ingenio gloria vestra meo.

Genus



**G**enus Dioxippi Liguris nobilissimum esse affirmabat Hermogenes : quem Dioxippus jam tum in patriâ familiarem habuerat, nunc cum literis ad me Hirciumq; è Gothuniâ miserat. Me percontante præfabatur isdem : majores illius cives è Rep. Catanæ amplissimâ laude fuisse omnes. Alexandrum avum à consanguineâ Adurniorum gente invitatum Siciliâ Liguriam primum mutasse. Cum enim ad maximarum opum splendorem summæ prudentiæ opinio accessisset, corruptis civium moribus hunc unum repertum esse, qui leges conderet.

Quamtâ invidiâ flagraverit vir innocentissimus, quòd pleriq; inertes improbiq; essent, paucis in magnâ civitate firmis & rectis, esse conjicere. Vertisse propterea solum, nec Genuæ expertem honorum vixisse : in quos æquè atq; in fortunas successerit Otho filius patre dignus.

Verùm, ut solet, cum & illic res secundæ suos invenissent latratores, suggillantibus primùm, ac patrem Othonis summo genere natum terræ filium per calumniam Fregosis nominantibus, machinam deinde cudisse ipsos, quo urbe eum pellerent. Copriam quemdam fuisse Sardum plenum probri, qui repetundarum illâ in insulâ postulatus, atramentoq; futorio absolutus Genuam se contulerit.

Eâ in urbe ubi se in Fregosiæ domûs clientelam gratiamq; concilia-



ciliaſſet, multum ejus ope uſos, qui Othoni adverſabantur.

Nam & profugum Alexandrum è Sicilia palam adeoq; inter canalicolas dictitaſſe: & confictis rationibus, quaſi contraxiſſet pater, æs ingens alienum ab Othone exegiſſe; factione cui adhærebat, cauſam ſceleſti hominis adſerente. Eoſdem negotia, quæ habuiſſet in exteris, ut Italicæ opulentiaſ res ſunt, conturbaffe cum extrema perniciæ optimi viri.

Cum conjuge proinde lectiſſimâ foeminâ Plotinâ è Carviliorum ſanguine tribuſq; liberis Teſtore, Dioxippo & Eugeniâ tunc ſeptem & decem annos natâ diſceſſus conſilium iniſſe.

Ante abitum in Senatu expoſuiſſe, quæ ſibi ſuiſq; duriffima deniq; impenderent; ſi eò loco, qui ipſi cariffimus ſit, perſiſtat.

Niſi in patriâ in egeſtate afflictuſq; vivere, niſi lege prædicatoriâ aut ſua venire, aut ſe in vacuum pendere velit; aliò terrarum gentiumq; ſibi emigrandum eſſe. Non modò nihil Patres aut populum de priſtino amore, benevolentiaq; remittere viſos, verum etiam lacrumis dicentem proſequutos, ac tantum non pervicaciam paucorum, qui plus in Rep. poterant, deteſtatos.

Antricum itaq; Galliaſ tranſalpinæ oppidum non ignobile conceſſiſſe.

Eo in oppido ſeverioris notæ civem adhuc ſuperare Maſurium nomine, qui cum vetus hoſpitii juſ Othoni fuerit.

Illo ſvadente



dente, propter viri integritatem in Galliâ domicilium elegisse.

Vix tertium ibi exegisse annum, cum uxor diem suum obierit, marcescentis stomachi vitio absunta.

Pòst paullò ipsum maritum in visis esse desiisse natu grandem & septuagenario anno minorem.

Priusquam vitam reddidisset, filiis mandasse; ut pietatem ante omnia, deinde concordiam inter se colerent: pauca æris alieni reliqua præsentis argento dispungerent: trientem hæreditatis solidum sorori dotem relinquerent. Eam pecuniam fidei Masuri crederent: eidem sororem curæ fore, donec honesto matrimonio viro jungeretur, aut in nuptiarum jura transfret alter è fratribus. Ipsi attenderent, quid Terentiæ suæ commendârit

Tullius de puero: mediocri virtute & fortunâ opus esse, ut cœtera consequatur. Abunde opum fore, quam tæcumq; eæ fuerint, quibus firmam virtutis possessionem acquirerent. Ea bona sibi ex æsse compararent, quæ nulla tempestas, nulla injuriæ auferât.

Necessariis inde valere jussis omnibus, animoq; ab omni transeuntium rerum curâ se vocato inter ardentissimas preces sanctissimum senem ad immortalitatem receptum.

Patris cadavere ritè sed absq; ullâ funebri pompâ (quod idem fieri præceperat) condito, Eugeniâ in familiam Masurii abiisse, Dioxippum vicinam



Aureliam, Testorem Bononiam majoris doctrinæ adipiscendæ causâ profectos. Non mediocribus impensis positis, cum nusquam literati muneris præclara occasio fuisset, id tamen sæpius prædicasse, immortales se patri debere gratias, qui de optimâ ratione in longitudinem consulisset suo generi. E-  
quorum postea mangonio adjecisse animum alterum, gemmarum mangonem factum esse alterum; non parum industriam eorum adjuvantibus his studiis, quibus dextrè incubuerant. Tritum hoc utriq; esse: ibi se patriam habere, ubicumq; bene sit. Initiò in Heduis simul rem fecisse, postea Insubriam petiisse. At verò intellecto, quàm non omni loco pariter æstimentur quævis artes, lucrosūq; sit omne vitæ genus; subsistente Testore Dioxippum Venetias, hinc Romam, inde per Apuliam natalem majorum urbem Catinam perrexisse. Lustratis gentis incunabulis Græciam, marisq; Ægæi insulas atq; ultra Cyprum adiisse. Demum per Herculeum fretum circumitâ Hispaniâ reducem in Galliam contendisse. Masurium sororemq; cum salutasset, diucule commoratum Teutoniæ commodam in votis habuisse. Quamprimùm veniâ hospitis ac sororis licuisset; trajecto antè, quod inter Morinos Britanniamq; est, freto, divitisq; insulæ peculiari Orbe emenso in ipsam se deſortasse tamtopere



pere expetitam Germaniam. Quam ubi bel-  
lis ab Oenotriâ gente deformatam, à suâ rapinis  
pessumdatam, futuram Gallo Hispanoq; prædam  
inter tot urbium ruinas atq; excidia circumsecus vi-  
disset, ad hunc habitum regionis Reiq; Germanæ  
tamtâ nocte oppressæ ac penè conclamatæ exuto  
omni amore ejus in proximam Poloniam, doctam  
hodie nationem & moribus cultam, per Lygiorum  
confinia se contulisse. Nec Moschorum Borysthe-  
nidarum ditione abstinuisse, sed institutis barbari  
populi ac durissimo dominatui asveti offensum per  
amoenissimos Livoniæ agros in Borussiam viam ve-  
nisse. Quoties Moschicam vernilitatem perstrinxis-  
set, admiratum quid reponere possent ii, qui Re-  
rump. ortus, incrementa, interitus, gentium mores,  
leges, omnia deniq; ad astra cœliq; domos & figu-  
ras referunt, quin imò ex iisdem rerum futurarum  
præensionem sibi asserunt; si finitimi liberalisq; po-  
puli diversum regimen, ingenia, studia, immortalis  
deniq; Dei religionem objeceris. Forte fortunâ  
oblatos sibi in Borussiâ dictitasse, quos inter carissi-  
mos locaret, Hircium cum Zamelio. Sanè, inquam,  
Dioxippus quàm à nobis redametur, testis sit ipse a-  
mor. Sed age dic, ubi caput tam dilectum nobis?

Tum ille renidens: quo loco sit, quo res ejus,  
ipse dicet: ac simul literas ( quarum mentione hac-  
tenus



tenuis sibi temperaverat) expedit. Ex nomen Hir-  
cii meumq; præferentes à rebus verbisq; erant tales  
propemodum: Si valetis, viri amici; & vobis &  
mihi gratulor: vobis, quòd hoc periculossimo  
tempore ita imprimis liberis generiq; vestro expe-  
dire judicem: mihi, quòd vobis superstitibus vir-  
tutis fructum hoc jucundiùs percipere mihi videar;  
quòd plures sunt, qui de eà rectè sentiunt. Quam-  
vis maria longinqua terræq; me vestro cœlo sepa-  
rent, de vobis tamen sollicitus omnes, quotquot è  
Glossariâ huc appellant, vestrà causâ adeo: qui hac-  
tenus vobis latui. Patriam inveni Gothuniam;  
in quâ mactæas Italiæ etiam principum virorum re-  
cta ignorat simplicitas, secura interim fraudis & ve-  
neni illiti. Vbi nec crapulæ aut ventri deditum  
vulgus: proinde nec sceleri apertum contento la-  
bore spiritum frangit robusti pectoris. Quippe  
qui nunc domi rusticâ supellectile parandâ, vel ruri  
sæpe contumacem glebam vomere proscindendo,  
nunc sub terrâ in fodinis puteisq; metallorum ve-  
nas perscrutando sibi & patriæ utiles occupantur.  
Patriam, inquam, inveni: solam terrarum, in qua hi-  
strionicæ levitati locus datus non est. Vbi  
rudi penulâ aut palliastro superintectus basilicas vi-  
cinarum urbium ingredior, nemine in risum verten-  
te frugalis animi continentiam. Vbi nec hiemes  
sæviunt



ſæviunt nimis, nec æſtivi dies caloris languent in-  
temperie. Non ſum neſcius, miZameli, quid heic  
mihi obſtrigilles, cui nihil moderatius Draufide  
Tuâ, ut Ariſtoteli Græciâ ſuâ. At proximas ſal-

tem hiemes patriæ Tuæ cogita: quarum immani-  
tas tanta fuit, quam tam ab antiquiſſimâ memoriâ  
non ſenſiſſe fertur mea Gothunia. Vtcumq;

ſit, plus heic remedii adverſus iſtuc malum, cùm à  
ſilvarum frequentia, quæ oppidis pagisq; ſua relin-  
quit ſpatia; tum in ferarum pellibus, in quibus æſti-  
mandis nondum infania modum habet diſſitarum  
gentium luxuria.

Cæterum ſi ad avitam natio-  
nis gloriam, æquè literis atq; armis partam, ſtupen-  
dæq; virtutis monumenta paſſim per inſulam ere-  
cta oculos animumq; convertas; nec invidiam fa-  
cias populo, nec in ullâ confuſarum alibi gentium  
hitoriâ par aut ſimile obſerves. Prædium in eâ

mercatus ſum his facultatibus, quas genitor mihi  
ſummas eſſe voluit: iis nimirum, quæ fortunam  
Numen non habent.

Ad Procères admiſſus  
non ſine certâ ſpe tamti emolumenti dimiſſus ſum.  
Plura de me non dicam: quibus rebus animos illo-  
rum mihi devinxiſſem, ex aliis audietis.

Ruſcu-  
lum meum juxta maris littus inter duos extremæ  
altitudinis montes porrigitur; in terrena, collicu-  
los, lacus piſcinasq; diviſum.

Horum quodli-

B

bet



bet mihi satis superq; fructuosum: nec montes,  
quorum alterius fastigium procul intuentibus in al-  
terius jugum prominari conspicitur, in noxâ. Quer-  
cubus enim, fagis, ornīs, pinubusq; aptis cū porcu-  
lationi, tum ædificiorū substructionibus, igniumq;  
fomento arboribus abundant. Prætereo eam  
materiæ firmitatem & copiam, quam non solum  
Dinolmia Tusculanum meum, sed universa Gothu-  
nia fabricandis myoparonibus, triremibus adeoq;  
onerariis navibus penè omnibus subministrat; ut  
si sola ejus egena foret, vix Orbi huic committerent  
alterum, qui mare transeunt. Nec piceâ carent  
nemora fundi mei: quæ si cum Brutiâ in contentio-  
nem veniat, optima vinariorum calculo audiat.  
Prætorium in medio agri si non augustum, ad vitam  
tamen hanc etiam honestè degendam sufficiens. Sic  
stabula armentis oviumq; gregibus sunt, ut in tuto  
sit res pecuaria. Animus quidem demoliendæ  
villæ ut pote quæ in rimas defederat, iterumq; pro  
habitu pecuniarum excitandæ suberat: sed cū  
architecti imposturas penitus introspicerem, vix in  
fundamenta suppeditabat, quod perducendo ad  
culmen operi destinatum erat. Ita conatûs illi-  
us ludibria quasi plura majoraq; deliberans cautâ  
dissimulatione transmisi. Segetum fertile est  
solum, vervactis spem cultoris sui numquam eludē-  
tibus



tibus. Lacus piscinæq; refertissimæ omnis generis piscibus maris opportunitatibus tamtò magis cedunt, quamtò magis portuum commoditas vicinas urbes & accolas dicit. Adde singulare villæ decus dirivatorium sumtuosam veteris domini fabricam: quâ non modò aream operaq; intestina exornavit, sed hortos etiam post ædium consepta in clivum procurentes, frugiferisq; arboribus in quincuncem dispositis decoros irrigavit. Ferinæ carnis aviumq; silvestrium vulgari gentis industriâ tantum sufficit, ut in familiæ alimoniam plus satis esse possit ea copia. Est præterea sua doctis animis voluptas in montibus: gemino vertice is attollitur, cujus extimum latus Boreas verberat. Quorum hunc Parnassum, illum Citheronem Liberi etiam mediastrini mei appellitant: qui erga istum est, Heliconis nomen à me vicinitatis consensu meruit. Hoc à veris illis differunt, quòd pro lauru juniperum nec ipsam inutilem aut Phœbo contemptam arborem producant. Eadem mecum Terminalia facit Licinius Vrsinus parentum culpâ perditis rebus Italiâ profugus, vir non fucatæ probitatis & modestiæ: quo utor multum, sæpe vocatu ipsius, cum domo abesse licet, aut sacrorum causâ aut sine malo. Nunc morem gentis promptâ facilitate affectando, nunc omni genere popularitatis animos



prosequendo multitudinis, quæ circum est, studia incendo. Ad Braorum Axellorumq; magnatû favorem, ad quem multi non propter eorum insolentiâ sed graviss: occupationes adspirare non possunt, viam mihi patefecit gemmarum mangonium, & hoc ex me & reliqua mea studia commendante Ausenio nobilissimo Regni hujus Musagetâ, omniumq; amantissimo, qui literas amant.

De ipso nunc mangonio fortean quæritis: præsertim cùm habeat Gothunia, quo sitim delicatarum mentium hac in parte expleat.

Certè id otii à villicatione non suppetit, ut gemmarum mangoni mihi esse liceat.

Nec colo nunc eas artes tot in universâ Europâ eas confectantibus, in vestrâ autem Borussia etiam promiscuos scrupos micaq; inter glaream studiosè legentibus.

Qui pro legitimis Adamantibus, Smaragdis, Achatis, Corneolis, laspidibus (dum lithoglyptæ, qui poliunt, in suo lucro rem strenuè promoveant) meras nugas venditant.

Nimirum cùm non desint albæ mentes, bonisq; humeris emtores, qui fidem insigni mendacio non sine suâ jacturâ adstruant; etiam ultro improbitati succumbit obnoxia credulitas.

Querebatur adhæc, nihil sibi interea molestius fuisse loquacitate Grammatici cujusdam: quem è superiori Germaniâ advenientem Lare mensâq; participaverit.

Eum sæpenumero



rò Regiā accessisse flagitatū, ut ( quod in Germaniā impetrasset ) nulli præter suos ederentur libri Grammatici. Temulentū paucis pòst mensib extinctum esse, non domi ipsius, sed Sideropoli in cellà vinaria. Rogabat deinde, ut si ire visum volupe esset ipsum, qui noster esset, quoad his rebus exiret; mare vernis Solibus tranquillum transmitteremus Austro spirante non multarū horarum spatio. Postremū excusabat, quòd nimium epistolam extendisset nec quæsitioribus verbis nec sententiis usus in ea celeritate, qua navis expedita esset itura tempestivè in portum Drausidos.

Lectis literis cū prandiolo, quale è dapibus agrum non urbem colenti inemtis constare solet, villoq; Campaniæ sub immodico æstu hopitem accepissem, si ad Hircium mecum vellet, quæ: præter quod enim aliàs mihi condictum iter eò sit, fore nuntium totamq; hanc rem gratissimam viro Dioxippi valde cupido. Annuit ille, an longè eo sit interrogans. Hodie, inquam, antequam crepusculascet, in Hirci prædio Te sistam bono cum Deo. Calore Solis igitur remittente adductisq; equis eos conscendimus: nec dum noctis adventu dies expiraverat, cū fundum Hircii ingressi sumus. Quem licet malè pedatum tibiā ad sideratæ arboris truncum offensā invenissemus, cū uterq; saluta-



set; vultu ad hilaritatem composito non coactam, salve & Tu amicorum conjunctissime, ait, unâ cum umbrâ Tuâ : quas non nisi Te & amore meo dignas adducere soles.

Cui ego : imò si Dioxippus Tibi cordi est, non nihil officii veteri ejus amico tribues.

Ad hoc nomen familiaris collocutus peregrino hospiti, quid de Dioxippo haberet percontatur? ille obiter quædam prolocutus literas ab eo ad utrumq; nostrum pertulisse commemorat. Cum tradidissem, atq; is fronte & voce per intervalla favens perlegisset; quærebat utrum in cœnatione, an in horto sub diductâ in brachia vite requiescere malle. Placuit horti incomparabilis amœnitas, sub jucundo nec Solaribus radiis perstricto aere. Interea dum cibo reficimur & vino, quale Nyssæis in jugis ipsum consevisse Bacchum crediderim, multum de Dioxippo exquirat Hircius, tum de villæ ejus positu, proximæq; regionis conditione, arvis, novalibus, & collinis in locis & palustribus; in sermonē post de arbutis, arundinetis ac salictis delapsus, nec bubuli equiniq; pecoris aut ovium deniq; foeturæ immemor.

Cum alta nox incumberet, ac mihi ex sedentariâ fatigatione jam non invito somnus obreperet, hac lege dimisit id rogantem, ut triduum unâq; Hermogenes conviveremus in agro suo nostris quisq; moribus.

Nam quid me  
in



in convictu offendere posset, exploratum habebat optimum nec in fastidio amicorum ludibundum caput; ignarus adhuc, quæ nausearet Hermogenes. Facile manendi legem mihi perſvasit, ut qui vadium in urbe nullum constitueram: facile novo hospiti, qui cultissimi ruris delicias oculis nondum satis usurpaverat. Adjiciebat eâ morâ sese confirmaturum, comitem in reditu ad urbem futurum recipiens. Habere enim aliquas rationes purgandas cum improbo cive, qui salsamenti cannabiq; in rarissimos villæ usus plus ei imputet, quàm acceperit. Eum si inspicias, inquit, facilè quam nauci homo sit, colligas; oculorum orbibus non integre, nisi interstitio plenius extante, cœteris in facie omnibus fronte præsertim recedentibus, quasi in fraudum latibulum velante capillamento. Nec satis homini nefario obiter decepiſſe, nisi necessitates quasdam majorum affingat, quò non suspecta fide major sit furandi licentia. Altero tertioq; die nullas non fundi partes mecum obibat hospes Italus, lacus scaphâ, fossas saltu, montes cursu superando; vir etiam Clytoneo illo Homericæ pedibus melior, in opere agriculturionis nonnumquam occupato villæ domino.

Manifestâ inſequentis diei luce, nec turbido sed lenissimis ventis gratum frigidum cœlo, ipsaq; tempestate

pestate abiturum hortante, jumenta insterni juber  
Hircius, eamdem nobiscum facturum viam, ut pro-  
miserat. Iam admoti erant equi; cùm ecce su-

pervenit senex Masurius è Galliâ. Qui agnito  
Hermogene statim in complexus ejusdem ruens,  
deinde in nos intuens salvete, ait, Dioxippi aman-  
tissima pectora: cujus si virtus præsidium sui non  
absq; pulcerrimâ accessione voluntatis vestræ inve-  
nit, & in hospitem ejus olim in Carnutibus non in-  
iqui eritis.

Cui Hircius: tamtum hæret in no-  
stris fibris Dioxippus, ut bene esse velimus omni-  
bus, qui hunc amant Ligurem. Octoginta annos  
vivendo excessisse videbatur meritissimus senex.  
Corporis animiq; vigor erat, qualis est mediam æta-  
tem agentium.

Quem læto adfectu notans Hir-  
cius mirificèq; prosequens domo invitat hospitem.  
Eâ exceptum dum in hortum ducit, scitatur is inter-  
eundum ex Hermogene, nuperne è Gothuniâ venis-  
set? salvusne sit Dioxippus? Adfirmante hoc, sub  
hospitali arbore aliquantum ex concussione equi,  
incertæq; & asperæ viæ tædio fatigatus confedit.

Quærimus cœteri (nam Hermogenem non igno-  
rasse putaverim) quæ causâ viæ viro non tam cani-  
tie quam annis obsito? Dioxippi, respondet ille,  
foror.

Obsecrasse eum sæpe missis literis, ut non  
mitteret hanc, sed ipse eâdem navi adveheret: utq;

id



id vitæ, quod superesset cum patris suoq; amico  
transfigeret ex illâ copiâ; quæ satis sit futura. Con-  
fidere dulcius mihi id esse nomen, quàm genitalis  
soli: quod, si qui genuere amiciq; desint, inane sit  
& inglorium.

Distractis igitur prædiis, inquit,  
quamvis illâ tempestate pretium eorum retro abiis-  
set; in hanc, ut videtis, viam me dedi.

Quod meâ  
causâ non faciebam, nisi probitas istius generis  
prorsus perspecta mihi fuisset.

Inter alia sum-  
mam puellæ modestiam celebrabat: eam tam an-  
xiè cum conjugè, quæ nunc inter plures, habuisse;  
quàm mater unicam filiam.

Ipsam non de pa-  
rentum exilio deplorasse, sed quæ etiam immeren-  
tes sequitur, improborum calumniâ.

Quoties  
Antrici Veneribus permista sedisset, instar Medæ  
se comparasse, quæ gypsatis manibus (ut ait  
Comicus) Corinthiacis matronis persvaserat, ne sibi  
vitio verterent, quod abesset à patriâ.

Nempe  
nec suâ aut parentum culpâ id evenisse; sed eorum,  
qui patris virtutes oderint.

Celocem referebat  
negotii causâ huc è viâ applicuisse nâvis magistrû:  
quatrduo post, quàm portum tenuisset, egredi con-  
stituisse: id in excensu, si in Gothuniam vellent, e-  
dixisse.

Si Dioxippi sororem adduxisti, inter-  
pello, ac in diversoriam tabernam compegisti libe-  
ralem mentem, nec ea inter meos est; ægre mihi erit

**C**

hoc

hoc facto. Et erat animus jam nunc excusandi istam audaciam, inquit: est domi Tuæ. Dum in his sumus, advolat puer Solem meridiē esse dicens, paratum prandium. Fervore sideris acrius stimulante triclinium elegimus. Iussus est præire bonus senex Hircio monstrante tramitem. Si est, ut non nisi pransis ire libeat (facile enim & de nostro itinere in mentem venire poterat) maturato, ait, mihi opus est ad necessaria quædam expediunda, & quod sollicitè reditum meum expectat Eugenia.

Mensis remotis, itum est: ac quanquam vergente in noctem die portam subiissent mecum, coci tamen sollertiâ coena instructa est, ut rectam judicaret etiam nepotulus aliquis Apitii. Eugenia in decentem humilitatem se submittens deprecabatur, ut sibi ignoscerem, quod meo tecto successisset: astruebat, pugnam pudoris fuisse cum officio, quod ab fratris amicitia esset. Ignaram beneficiorum, quæ Hircius mecum in eum contulisset, videri potuisse, non sine suspitione fraternæ ingratitude, qui in Carnutes inter alia non renūtiasset; nisi hanc sumisset fiduciam. Quintus post vigesimum annum non minus moribus, quam facie eleganti virgini abiverat. Tamtæ erant istæ dotes in succido corpore, ut honestissimum quemq; suâ veluti pellaciâ adverterent. Cum extremo loco etiam infra liberos



beros meos accubisset; scin Tu, ajo, à summo bibendum, ab infimo dandum esse svavium? Iam erit, qui Tibi osculum ingerat accepti nobis adventus Tui symbolum.

Sic surgens partes juxta nutritium latus ejus claudens occupat.

Cum majori poculo, ut est Germaniæ consuetudo apud recentes hospites, postulassent Masurium; subridens ille miror, inquit, sed procul cavillo, amicissime populi nostri, in vestris sodalitiis etiam cogi ad potandum eos, qui nihil min<sup>9</sup> sentiunt, quàm sitim. Non aliter, subjiçio, quàm vos Galli ad saltandū impellit nonnumquam eos, quos mæror conficit.

Hoc vibrato in eam sannam telo, risu discussa est utriusque gentis vanitas.

Exin sermone de Germanorum ritibus, civitatibus, principibusque earum ac Magistris instituto, ac tandem ad hanc usque provinciam producto; quos & quot in patriâ virtutis nomine colerem, Masurius interrogabat.

Si ad hoc me nomen alliges, respondeo, præter Appionem, Cajanum nec non Titurium, qui occurrunt, non valde multos Tibi ex isto albo recenseam.

Et si enim nulli præclusa sit virtus, ut parasitatur eidem bonus Seneca; tamen quàm arduum sit ejus iter, minimè Tu ignoras, integerrime senex.

Postquam etiam ingruentem diem multâ nocte transactâ jucundè fregissemus, iterumque illuxisset; Masurius

mogenesq; cum puellâ collectis sarcinis navim abi-  
re parantem anhelabant: quos delibatis pridianæ  
coenæ reliquiis cum nostris ad Dioxippum literis e-  
untes ego cum Hircio inter longa vota ad portum  
usq; deduximus. Rescriptit brevi Dioxippus  
omnes incolumes secundis ventis pervenisse in Go-  
thuniam.

Ne reliquæ vacarent pagellæ,  
placuit auctori subicere Epigrammata ali-  
quot Lectoris gratiâ.

*Ad Generos. & Magnif. Dominum*  
**IOAN. NICOD. AB AHAUSEN**  
Regni Svet. Ordin. per Borussia  
Commissarium.

**V**enic Hyperboreis, ut fertur, classis ab oris?  
Visere nostra Comes Gardius arva parat.  
Siccine, Nicodama, referens hæc arma, quod opto,  
Rureq; florebit dulcis oliva meo?  
Si quid erit duri rigido sub Marte ferendum,  
Dic illi hoc: Vati parce, Gradive, Tuo.

Ad eundem.

**Q**uid mihi cum veterum Papali more parentum?  
Constat & antiquos desipuisse patres.

*Inspi-*



*Inspicio fastos : Tua nomina, lane, recurrunt,  
Nulla tamen manibus vincula mitto Tuis.  
Non bene servilos patitur mens libera nexus :  
Nec suus est, quisquis brachia vincta gerit.  
Vive Tuo ingenio, cui iusta dat aura vigorem,  
Ardua quo clara munia gentis obis.  
Ire jube famulos, pinguesq; innectere gallos,  
Et figi si quis dapifilis anser erit.  
Tale cadat pro Te genus inter vota Tuorum,  
Pone merum : turba pars ero magna Tue.*

---

*O*Xenstirniade simul hic natalis amica  
Luce ruit : nostra sospes it ille prece.  
Dic animo, patrius qui se virtutibus implet,  
Quam non in nexus possit abire meos.  
Hunc vincere, sibi qui tot de vinxerit urbes,  
Esse probum sanâ mente Poeta negat.

### *In Mergam puellam.*

*S*I patrias sprete nataeque hoc rure puellas,  
Luminibus sprete es, Merga puella, meis.  
Sed mea Drusicolae laudarunt carmina nymphae :  
Hoc Merga, hoc in numero Te tamen esse nego.  
Merga, aliquid crudi naturae dotibus haeret.  
Pulchra licet facies sit Tibi, more rudi es.  
Sape illud puero dixi, quod rarior hospes  
Audiit, & potuit discere tota domus.  
Me potius cumulo referas, ô nate, superstes;  
Quam thalamos intret rustica virgo meos.  
Ut desint curae, quae pectora nostra fatigent;  
A consorte rudi caussa doloris erit.

*Responsio ad*  
**Excell: D Georgium Lothum**  
Ph. & Med. Facult. Seniore in Acad. Reg.  
Archiatrum Elect. Brandeb. in  
Borussiâ &c.

**Q**uisquis es ô superûm, sinceri præses amoris,  
Seu gens Te Fidium ritè Latina vocat,  
Seu Grajo melius Philium Te nomine dicam,  
Audi non vanis verba profusa labris:  
Ara mihi sint hæc dēxtra monumenta Lothæa,  
Heic ego procumbo, polliceorq; fidem.  
Ite rudes elegi, quos incitus extudit ardor,  
Et mea vota meo reddite, ferte Lotho.  
Noster erit, nostri pars ille erit altera cordis,  
Donec in hoc aliquis corpore sanguis erit.  
Donec erit, gelidos animet qui spiritus artus,  
Tangetur nostrum pectus amore Lotbi.

De novis è Sveciâ copiis.

**N**on ita fulmineos condet Mars improbus enses,  
Vertet & in falces arma cruenta faber.  
Quamta manus Gothicis iterum descendit ab agris!  
Quale decus populi militiaq; ducis!  
Credibile est, vitreo stupuisse sub æquore Nymfas;  
Cuiq; maris regnum est, hunc tenuisse gradum;  
Cum ratum moles videre tot arma ferentum,  
Tot Gothici Regni signa, tot ora virûm.  
Tu tamen ex alto Pæx auræa prospice cælo.  
Bellorum ardentes Tu premis una faces.



# Ad Sereniss: ac Potentiss:

Sveciæ Reginam:.

**O** Dea, cui gelidi fasces Pater asserit Orbis,  
Tunc potes teneris bella jubere labris?  
Tunc potes virgo tetricas armare cohortes,  
Inq, Tua excitos cogere castra duces?  
Sarmaticum malles in fœdera mittere Regem:  
Mallet & hic. Sed vos fata dii q, regunt !

Ad Gotofredum filium.

**V** Isneri ad limen nostri, puer, ibis amici :  
Quà Tua sunt pupo nomina facta novo.  
Quà Tata jam patri Gotofridulus ore tenello,  
Iam matri dicet Mamma, sinumq, peter.  
Sæpe Tui vises, fili, cognominis ædes ;  
Seu violas illi liliaq, alba feras,  
Sive rosam portes, patrio quam fregeris horto,  
Et referas pueri de patre poma, nuces.  
Tale Tuum officium non utilitate carebit.  
Qualis amor patrum est, stirps mea, vester erit.

Ad famulum.

**P** Lanta peregrinis Italarum notior hortis  
Nunc & in arbusto surgit clipea meo.  
Nonne vides, sumtis ut se Mars jactet in armis ?  
Pacis ut exoso nomine bella crepet ?  
Velle, puer, teneram ; licet hoc comprehendere fundo  
Cœperit, eductam Mariæ turba premer.

### In Catillum Grammaticum.

**E**t si rictus & tora conuoluit ore Catillus.  
Gelus erit a Medicis. Nam putat esse febrem.  
As vos solliciti ne longius errate amici.

Debet & expansis parcere Libris iuis.  
Grammaticos ausus vacare lacer ore Catillus  
Quasi vix post Grammata. Sic macuit.

Iano Erixonio Gotho, viro doctis:

**S**unt quae sub solâ sunt sincerius Arcto:  
Qualia promissis jam puto nostra Tuis.  
Queris, Erixoni, quae sint ea munera? dicam.  
Res est exiguâ pondere, caseolus.

### In Cossium Grammaticum.

**G**rammaticus cum sit genitus patre Cossus avoq;  
Grammaticis, altum jactat ubiq; genus.  
Sic puto patris avum jactavit Pyrrhus Achillem.  
Alcidemq; satum de Iove matris avum.  
Hec, Cossus, aliorum stirpem se dicere Regum.  
Sordida maiores turba fuere Tui.


### In quemdam.


**L**ibera mens non est nummis adjuta patreni.  
Novi ego Te sumtu nil didicisse Tuo.

### In Falconem Rhetorem.


**O**rationem Falco Rhetor edidit.  
Partem illius de Plinii transcripserat  
Panegyri: de Tullii partem alteram  
Ligario. Fabii est, quod ultimum affuit.




























Biblioteka Jagiellońska

sldr0019523



